

IN ACHTO ITLAHCUILOLAMAU IN TETIOTLATITLANIL PEDRO

1 Nehhuatl in Pedro
nitetiotlatitlanil den Jesucristo.
Namechihcuiluiya inin amatl
ica namehhuan tlaneltocanimen
aquin nanchanquistoque
ipan namoaltepeu huan axan
nanchantihtohque ipan in tlalten
Ponto, huan Galacia, huan
Capadocia, huan Asia, huan
Bitinia. ²Huan namehhuan
aquin Dios Tohueyitahtzin
mechtlapehpenilohtoc ijcon
quen yimotlalihtoc ihcuac opeu
in tlalticpac. Ica in Itiotonatzin
mechsecnintlalilohtoc ic
xitetlacamatican. Ic oyestiquixohuac
in Jesucristo, ijcon cuali
omechtlapohpoluiloc. Huan ic
inon mamechuelitalo tequin huan
mamechyoltlalican.

Timochixticatec ica totetlocolil den neliuac

³Matitemahuestilican in Dios
aquin Tetahtzin Totecohtzin
Jesucristo. Tequin toca tlcoyalo,
huan ic inon otechmacaloc in
nemilistli yancuic. Huan ic inon
tinentificatec quen ticchixticatec
tlen tonali titeitasque in Dios.
Otechyoltiloc ica techicahualis

ijcon quen oteyoltilo in Jesucristo
den mijcamen. ⁴Huan ijcon
nanquiselisque in namotetlocolil
tlen Dios mechehuilolohtoc ipan
in neliuac. Yeh in tlen ahmo
quimautoc huan niyan ahmo pilinis
quen in xihuitle. Yeh in namonemilis
tlen nochipa huehcahuis, huan tlen
chipahuac tleca ompaca neliuac,
huan niyan ahmo ixpohpolihuis.
⁵Huan quen nanteneltocahque in
Dios, Yehhuatzin mechpalehuilos
ica techicahualistzin hasta
ihcuac nancalaquisque ipan
inon nemilistli nochipa. Oncan
nanquimatisque nochin tlen cuali
quiehualotoc ica namehhuan aquin
mechmaquixtilohtoc.

⁶Huan ic inin namehhuan molui
nampactoque, masque ipan molui
quesqui tonali nanquimachilisque
miyac tlamohsihuilistli. ⁷Tleca in
namotaneltoquilis quen in oro.
Huan in oro moistlacaahsi ica in
tletl, huan tla nele oro, ijcon nesi.
Huan ijcon namotaneltoquilis
moistlacaahsi ica inon
tlamohsihuilistli. In tlaneltoquilis
tlen quixicos ica in tlamohsihuilistli,
ocachi miyac ipatiu quen in oro,
tleca in oro tlamic. Huan in aquin

quixicos ica in tlamohsihuilistli, yehhua moselihtoc ica in Dios huan quimahuestilisque ihcuac monextihtzinos in Jesucristo.

⁸Yehhuatzin in aquin nantetlaoshtlahque masque ahmo nanteitztoque. Huan noyojqui nanteneltocahque masque axan ahmo nanteitahque. Huan nampaquihque ica in paqulistli tequin cualtzin tlen ahhue nanquiyequiluiyahque. ⁹Huan quen nanteneltocaticaten, ijcon nancahsitacaten in temaquixtilistli.

¹⁰In tlayolchicaucanimen den yihuehcau ahmo oquinehnehuilihque in tlen oquihcuilohque ica in tetlaoshtalis ica tlen otechmacaloc inin tlamaquixtilistli masque oquitemohuayahque tlen quihtosnequi. ¹¹Oquinequiyahque quimatisque tlen quihtosnequi in tlen oquinnextililo in Itiotonatzin Dios aquin oquintequiutilo. Oquihcuilohque quen tlapanolos in Cristo huan in tlen tehueyilistzin yes satepa. Huan ahmo oquinehnehuilihque aquin Yehhuatzin huan niyan quemana hualuilohuas. ¹²Huan in Dios oquinmatiltiloc ayamo oahsic in tonali ic matzonquisa in tlen otlanonotzque, tlahmo tzonquisas ica tehhuan axan. Huan axan otzonquis quen yomechmatiltihque yehhuan aquin omechnonotzque ica in itlahtoltzin den tlamaquixtilistli, quen noyojqui oquintequiutilo in Itiotonatzin aquin omohualtitlanque den neluicac. Huan axan in ángeles quinequihque quinehnehuilisque

ica inin tlamaquixtilistli huan ahhue.

¹³Ic inon ximoyecnehnehuilican huan ximotlacamatiltican namosel. Ica nochin namoyolo xitetemachican quen mechmacalos in tlen ayamo nanquipiyahque den tlamaquixtilistli ihcuac monextihtzinos in Jesucristo.

¹⁴Xinemican quen conemen aquin tetlacamatihque. Ayacmo xinemican quen ica in achto namotlamachilis ihcuac ayamo onanteixmatque in Dios. ¹⁵In tlahmo oacchi cuali, xinemican tlamelajcanten, tleca Tlamelajcatzintli in Dios aquin omechnotzaloc. ¹⁶Tleca ijcon ca tlahcuiloli: “Xinemican tlamelajcanten tleca nehhua no nitlamelajcan.”

¹⁷Yehhuatzin in Dios aquin mihtos tla cuali in tlen oquichiu cada seja, huan ahmo quinchicotlapehpenilo niyan aquin. Huan tla nantenotzasque “Notahtzin”, nochipa xitemahuestilican ipan nochin namonemilis nican tlalticpac.

¹⁸Tleca Dios mechmaquixtilohtoc ica in namotlanehnehuilis san tlaluis tlen omechnextilohque namochichicacoluan. Huan nanquiyeematihque in ipatiu ica inin temaquixtilistli ahmo san yeh in oro noso in plata, tlen tlamis. ¹⁹Tlahmo ipatiu in teyestzin molui patiyo den Cristo. Yehhuatzin motemactilohtoc ic omoseman teyestzin quen se colelo tlatemactili, tlen ahmo quipiya niyan tlen cocolistli huan molui chipahuac. ²⁰Temiquilis in

Cristo yitlatlalili de acho queman in Dios omochiu in tlalticpactli. Huan Yehhuatzin omonextiloc ipan inin tonalten hueloc ic micohuas namopampa.²¹ Quen ijcon omechmochihuililloc in Cristo, axan cuali nantetemachiyahque in Dios aquin oteihxtiloc den mijcamen huan otemacaloc molui cualtzin tehueyilistzin. Huan ic inon nanteneltocahque huan nantetemachiyahque ica tetlamaquixtilistzin in Dios.

²²Yinanyolchipautoque tleca nantetlacamautinemihi que ica in itlahtoltzin Dios. Ic inon cuali nanquintlasohtlahque in namotlasohicnihuan huan ahmo san ica tlahtoli. Huan axan tel, ximotlasohtlacan seja huan oc seja ica nochin namoyolo.

²³Ijcon yonantlacatque oc sepa ica in yancuic nemilistli tlen oquixpehualtiloc ica in itlahtoltzin Dios. Inin nemilistli ahyic tlamis tleca itlahtoltzin ahyic tlamis.

²⁴Quen in Itlahcuiloltzin quihtohua: Nochin tlalticpac tlacatl quen in xihuitl, huan nochin incualnesca quen in xochitl den xihuitl. Huaquis in xihuitl, huan huetzis in ixochiyo.

²⁵Huan in itlahtoltzin in Totecohtzin huehcahuis nochipa.

Huan yehhuatl inin in itlahtoltzin den temaquixtilistli tlen mechnonotztoque.

2 Ic inon, xiquilcahuacan nochin ahmo cuali, huan ayacmo xitlacahcayahuacan. Huan xitlahtocan in tlen melahuac, huan

ayacmo ximonexicoluican, niyan xitlatenehuacan.²Ximomachtican in itlahtoltzin Dios tlen melahuac quen in yancuic conetl molui quinequis in leche ahmo tlatequili. Huan ijcon nanmochicahuisque ica in temaquixtilistli ijcon quen mochicahuas inon conetl.³Tleca nele onancahsicamatque quen molui cualtzin tetlahtohtlalis in Totecohtzin.

Cristo quen in tetl tlapehpenili

⁴Ximopachocan ica Yehhuatzin, in aquin quen in tetl yolqui. Oteixtohuetzohque in tlacamen, huan ica in Dios, Yehhuatzin quen in tetl tlapehpenili huan molui patiyo.⁵Huan namehhuan xicmautiye can quen temen yolticaten. Ic inon ximocahuacan mamechtecpanaloo in Dios quen mochihchihua se cali canin mocahualos, quihtosnequi in tetiotlayehualoltzin. Huan ijcon quen tiopixcamen mosecnintlalihtoc ica in Dios, ximotemactican quen tepactiya in Dios ica techicahualis in Jesucristo.⁶Ic inon noyojqui omihto in Dios ipan Itlahcuiloltzin:

Nehhuatl nictlaliya ipan in altepetl Sión in iprehualoca in tiopantli, tlapehpenili huan molui patiyo.

Huan in aquin quineltoca ica Yehhuatzin ahyic tlocoxtiyes.

⁷Ica namehhuan aquin nanquineltocahque, Yehhuatzin molui tlahtolli, huan ica yehhuan aquin ahmo quineltocahque, tzonquisas quen omihto ocachi ipan Itlahcuiloltzin:

Inon tetl tlen
oquixtohuetzohque in
tequitcamen,
yeh in tlen oquitlalihque
ipehualoca.

⁸Huan noyojqui quihtohua ipan
Itlahcuiloltzin:

Huan omochihualo quen tetl
ipan tlen motecuiniyahque,
huan quen hueyi tetl tlen
quinmayahui.

Tleca yehhuan
motlapolochtiyahque quen ahmo
quitlacamatihque itlaholtzin Dios.
Huan ijcon quen ca tlatlalili.

Quen nemisquiyani in tlaneltocani

⁹Huan namehhuan
nantlaneltocanimen
mechtlaapehpenilohtoc in Dios, huan
noyojqui quen tiopixcamen ipan
tetlatequiutilistzin in Dios, huan
quen tlacamen mosecnintlalihtoque
ica san Yehhuatzin in Dios,
matlanonotzacan ica tlen cualtzin
omechchihchihuiloc. Huan ijcon
omechnonotzaloc maquisacan de
ipan in tlayohuilotl den tlahtlacoli
huan macalaquican ipan in tlanextli
den yancuic tlanehnehuilistli.

¹⁰Huan masque ic achto ahmo
onancatcahque tetlacahuan Dios,
axan queme. Huan masque ic achto
ahmo namoca otlocoyaloc in Dios,
axan queme.

¹¹Notlasohicnihuan, axan
nancaten quen sentlapalchanimen
huan san namotepaluihinetmihque
nican tlaticpac. Ic inon
namechtlatlautiya xiquilcahuacan
in tlen achto namotlanehnehuilis,
in tlen mechixtzacuiliya ic ahmo
xicnehnehuilican in yancuic

tlanehnehuilistli. ¹²Xinemican
tlamelajcan inepanco in aquin
ahmo teixmatihque in Dios. Huan
masque namoca tlahtohuahque
quen tla ahmo nancualten,
cuali quitasque in tlen cuali
nanquichiutoque. Huan ipan in
tonali queman teneltoicasque,
yehhuan temahuestilisque ica
namonemilis tlamelajcan.

¹³Ahmo teca matlahtocan
Yehhuatzin ica tlen
nanquichihuahque. Huan
ic inon ximotemactican ica
nochin tequihuahyotl, cana den
hueyixtoc romano, ¹⁴noso tlen
tequihuaheten aquin oquintitlan
maquintlapapanoltican in ahmo
cualten huan maquinmahuestilican
in aquin cualten. ¹⁵Tleca
Yehhuatzin monequi xicchihuacan
tlen cuali huan ijcon nontiyasque
inon xoxos ica incamanal.

¹⁶Xinemican quen
nantlacahcauten. Huan inon
ahmo quihtosnequi cuali
nanquichihuasque in ahmo
cuali, tleca ocachi cuali
nannemisque quen temajco in
Dios. ¹⁷Xiquinmahuestilican
nochten. Xiquintlasohtlacan in
totlasohicnihuan. Xitemoucaitacan.
Xicmahuestilican in hueyixtoc
romano.

¹⁸Namehhuan aquin temajco,
xiquintlacamatican namotecohhuan
ica nochin mahuesyotl, masque
cualten tlacatl noso ahmo. ¹⁹Tla
cana seja quitlahtlacoltisque ica
tlen ahmo quichiutoc, huan san
quixicos tleca nele iconue Dios,
ijcon molui tepactiya in Dios.
²⁰Huan tla mechtlahtlacoltisque ica

in ahmo cuali tlen nanquichiutoque, ahmo aquin mechmahuestilis in tla nanquixicosque tlamach ihcuac mechtlapanoltisque ica namotlahtlacol. Huan tla nanquixicosque tlamach ihcuac mechtlahtlacoltsique, masque ahmo tlen nanquichiutoque, yeh in tlen tepactiya in Dios.

²¹Tleca yeh in tlen monequi nanquichiutiyesque. Huan noyojqui otlapanoloc in Cristo namopampa, huan ijcon omechnextilic quen nanquixicosque ihcuac nantlapanosque. ²²In Yehhuatzin ahmo tlen otlahatlacolanal huan niyan queman ahmo otlacahcayahualo. ²³Huan ihcuac otecamanaluihque, Yehhuatzin ahmo tlen omonanquilhque. Ihcuac otetlapanoltihque, Yehhuatzin ahmo tlen oquiniluiloc. In tlahmo otetemachiloc ica Yehhuatzin Dios aquin tlixcomacalos tlamelajcan. ²⁴San Yehhuatzin otlapanoloc ica totlahtlacol quen otemicthque ipan in cruz. Ijcon omochiu ic otechmaquixtiloc ica in tlahtlacoli, huan ic inon tlamelajcan tinemisque. Yehhuatzin otecocohque huan ijcon onanmaquisque. ²⁵Quihtosnequi onannentinemiayahque nampoliutoque quen calnelo. Huan axan onanmotemactihque ica Yehhuatzin in Cristo, in aquin mechyolitahque quen in tlahpixqui ica in calnelohten.

3 Huan namehhuan
nansihuamen
xiquintlacamatican namotlacahuan.
Huan cana aquin de yehhuan ahmo quineltoca itlahtoltzin Dios. Ica

inemilis tlamelajcan in sihuatl aquin mocahuas tlamach imajco itlacau, yehhua cuali quineltoctis masque ahmo quinonotzas ica itlahtoltzin. ²Quihtosnequi in namotlacau ocachi quichihuasque cuenta ica namonemilis chipahuac huan ica mahuesyotl. ³Ahmo maye namocualnesca san den tlen nesi, cana nanquichihuahque cuenta san quen nanmocuailpiyahque, huan quen nanquintlaliyahque in pipiloli, huan quen namotlaquentihticaten.

⁴In tlahmo ocachi cuali nanquichihuasque cuenta maye cuali namoyolo tlen quipiya icualnesca tlen ahmo tlamic. Huan inin monextiya ica namotlanehnehuilis molui tlamach, in tlen molui cualtzin teixpa in Dios. ⁵Huan ijconon ocahcatca yihuehcau. In sihuamen aquin oteneltoque huan otetemachihque, yehhuan omonextihque ica incualnesca ijcon oquintlacamatque intlacahuan.

⁶Ijcon in Sara oquitlacamat inamic Abraham huan oquinotz quen iteco. Huan axan namehhuan quen in ichichicaixuihuan tla nanquichihuasque in tlen cuali huan ahmo nammomoutisque ica in tlen panos.

⁷Huan no ijconon, namehhuan nansihuahuahque, xicseematican tlamach ihuan namosihuau, huan xicchihuacan cuenta quen ichicahualis in sihuatl oc noncua. Ijcon quinam quis quen inehuan omechtechtiloc ica in yancuic nemilistli. Maye nochin ijconon huan mechchihuililos ica tlen nantetlatlautisque ihcuac nanmoyolmachtisque.

**Ximocahuacan tlamach
queman nantlapanosque ica
tlen ahmo nanquichiuque**

⁸Huan ic tlamis, xicpiyacan san se namotlanehnehuilis. Ximotlocolmacakan se huan oc seja huan ximotlasohatlacan quen icnimen. Ximotlapohpoluican se huan oc seja huan xinemican san tlamach. ⁹Ahmo ximocuepacan ica in ahmo cuali, niyan ica in camanali, in tlahmo oc noncua xiquintlaihtlanican in Dios maquintiochihualo. Huan ic inon noyojqui mechtiocihualos. ¹⁰Quen omihto Yehhuatzin:

In aquin quinequi paquis ipan inemilis huan nochin tonali quimachilis in tlen ocachi cuali,
maquilcahua in tlahtoli tlen ahmo cuali,
huan ayacmo matlacahcayahua.

¹¹Mamoyolcuepa ica in ahmo cuali huan maquichihua in tlen cuali.

Maquinehnehuili quen cuali quiyolsehuiya se itecocolihcau huan ijcon maquichihua.

¹²Tleca quinuelitalo Totecohtzin Dios in tlamelajcanten huan quinchihualos cuenta ica tlen tetlatlautiyahque.

Huan quinixnamiquilo in Totecohtzin Dios in aquin quichihuahque in ahmo cuali.

¹³?Huan tlen nanquinehnehuiliyahque? Cox, ¿concan aquin mechcocolis tla nochipa nanquichihuasnequihque in tlen cuali? ¹⁴Huan tla cana queme, xipaquican quen

mechuelitalos Yehhuatzin. Niyan ahmo xiquinmoucaitacan huan ahmo ximomohsihuican. ¹⁵In tlahmo xitemoucaitacan in Cristo ica namoyolo tleca nele Yehhuatzin Namotecohtzin. Ximoyectlalican nochipa ica tlen nantlananquilisque in aquin mechtlahtlanis ica tlen nanquineltocahque ica Yehhuatzin. Huan ijcon xicchihuacan san tlamach huan ica mahuesyotl. ¹⁶Huan ahmo xicchihuacan in tlen ic satepa mechyoelmohsihuisque. Huan ic inon ihcuac namoca istlacatisque, mochipahuas ahmo tlen melahuac. Huan ijcon mamopinaucamacacan tleca mechpactecahque ica cuali namonemilis temajco in Cristo. ¹⁷Huan cana monequis in Dios matlapano se tlaneltocani. Huan tla tlapanos ihcuac quichiutica in tlen cuali, inon ocachi cuali quen tlapanos ica itlahtlen ahmo cuali.

¹⁸Huan no ijcon in Cristo omicohuac ica tlapanolistli san secpa ica tlahtlacoli. Masque Yehhuatzin in Tlamelajcatzintli, omicohuac topampa tehhuan ahmo ticualten, huan ica tlen omochiu, techselilos in Dios. Huan otlapanoloc ica tetlacayo quen tlacatl huan oteyolitiloc ica tetonatzin. ¹⁹Huan ijcon ohuilohuac quinnonotzalo in aquin axan tzactoque ipan mictlan.

²⁰Inohque aquin oteixnamijque in Dios ihcuac omochixtoya ica tlapohpoluulistli ipan in tonali den Noé. Ohuehcau ic oquichihchiu inon barco tlen ihtech omaquisque san chicueyi tlacatl ica in hueyi tetzahuitl

den atl. ²¹Huan axan yeh in tlen quihtosnequi in tlacuatequilitli. Quen omaquisque inon chicueyi tlacatl den atl tlen oquinmicti in oc sequinten, ijcon otechmaquixtiloc ica tlen techpohpolonihque. In tlacuatequilitli ahmo quihtosnequi timaquisasque ica in atl quen ticpacahque totlacayo, tlahmo ic titetlatlautisque matechyochipahualo. Huan cuali techchihuililos ijcon tleca oihxohuac den mijcamen in Cristo. ²²Huan inon Cristo ohuilohuac neliuicac canin ilohuac ipan teyejcan in Dios. Huan axan ompacaten temajco in ángeles huan in tequihuaheten huan in chicautoque.

4 Ic inon tel, quen in Cristo otlapanoloc ipan tetlacayo, no ijcon xicnehnehuilican quen nantlapanosque. In aquin quinehnehuiliya quen omic ipan itlacayo tehuan Cristo, ayacmo ca imajco in tlahtlacoli. ²Huan hasta ipan nochin inemilis, tetlacamatis in Dios huan ayacmo quichihuas san tlen ic mopacmacas. ³Yopanoc in tonali ipan namonemilis ica inon ahmo cuali tlen quimpacmaca yehhuan aquin ahmo teixmatihque in Dios. Quihtosnequi in ixpoliucayotl huan in ahmo cuali intlanequilis, huan san tlen quichihuahque quen ica iluitl ic huintihtinemis huan quen quinmahuestilisque in santo tlamachihchiutli. ⁴Ahhuel quinehnehuiliyahque tleca ayacmo inuan nanmonelohuahque ipan inon hueyi ixpoliucayotl, huan ic inon namoca tlahtohuahque.

⁵Huan yehhuan quipiyahque tlen motemactisque ica innemilis teixpa in Dios aquin yimotlalihtoc ic quinixcomacalo in aquin yolqui huan in aquin yimictoque. ⁶Tleca yeh in ica oquinnonotzque in itlahtoltzin Dios inohque mijcamen aquin oquineltocaque. Huan ic inon nemisque nochipa quen nemohua in Dios, masque ipan tlalticpac miquisque ica intlacayo tleca Dios moyectlalihtoc quen nochin tlacatl miquis.

⁷Ayacmo huehcau ic tlamis in tlalticpactli. Ic inon ximotlacamatiltican namosel huan ximocahuacan tlamach, ic cuali nanmoyolmachtisque.

⁸Huan ic achto de nochin ahmo xiquilcahuacan ic nanmotlasohtlahque. Ahmo tequiyo nanquintlapohpoluisque in namocnihuan tla nele nanquintlasohtlahque.

⁹Ximotecpanocan se huan oc seja huan ahmo ximotlatzotzocahuican.

¹⁰Ximopalehuican se huan oc seja ica in tetiotlamatilis tlen mechmacaloc sehsen de namehhuan. Xicnehnehuilican quen ica tetlasohtlalis in Dios san mechtlaneutiyahque ica in namotlanehnehuilis huan ijcon xictequitiltican. ¹¹In aquin quipiya tetiotlamatilis ic matlanonotza, maye quen ica tetequihuahyo in Dios. In aquin quipiya tetiotlamatilis ic tlapalehuiya, maquichhua ica in chicahualistli tlen quimacalohtoc in Dios. Huan ic inon, quen mechyochipahualo in Jesucristo ica nochin tlen nanquichihuahque, ijcon

xitemahuestilican in Dios, tleca nochipa tehuaxca in mahuestilstli huan in tequihuahyotl. Huan ijcon mayeto.

Quen tlapanosquiyani in tlaneltocani

¹²Notlasohicnihuan, ahmo ximomohsihucan ica tlen molui tequiyomechpanos, tla cana ahmo mechpanoni. San mechichtacaahsilo tla chicahuac namotlaneltoquilis. ¹³Tlahmo oc noncua, xipaquican quen cuali nantlapanosque ijcon quen otlapanoloc in Cristo. Huan ic inon noyojqui nampaquisque quen nancalaquisque tehuauan ipan tehueyilistzin ihcuac oc sepa hualuilohuas. ¹⁴Huan tla mechixtlasasque tleca nanteneltakahque ica in Cristo, ic inon xipaquican. Tleca inon quihtosnequi nele namohuan mocahualo in Itiotonaltzin Dios mahuestic. ¹⁵In temictiyani huan in tlachtejqui huan in mocalactiyani quipiya tlen quintlapanoltilos. Huan ahmo maye niyan se de namehhuan aquin ijcon oquichiu. ¹⁶Huan tla cana tlapanos seja tleca tlaneltocani, ahmo mapinahui. In tlahmo matemahuestili queman ijcon tlapanos.

¹⁷Yoahsic in tonali ihcuac techixcomacalos tehhuan titechanihcahuan Dios. Huan tla yopehualoc ica tehhuan titlaneltocanimen, molui ocachi chicahuac quinixcomacalos yehhuan aquin ahmo oquineltocaque ica itlahtoltzin Dios. ¹⁸Huan quen molui tequiyomechpanosque in aquin

tlamelajcanten, niyan ahhuelticnehnehuilisque quen tlapanosque in tlahtlacolyo aquin ahmo quichihua cuenta ica in Dios. ¹⁹Ic inon tel, in aquin de namehhuan tlapanosque quen motlalihtoc in Dios, maquichiutinemican in tlen cuali, huan matetemachican Yehhuatzin ica inemilis. Tleca Yehhuatzin in Yolcualtzin aquin oquinchihuililoc.

5 Nehhuatl se tequihua quen yehhuan aquin namohuan caten, huan oniquitac quen otlapanoloc in Cristo. Huan noyojqui nicalaquis namohuan ipan tehueyilistzin tlen monextis satepa. Namechtlahtolmaca namehhuan in tequihuahaten aquin ompacaten ipan in tetiotlayehualoluan.

²Xiquinmachtican in ipiluan in Dios aquin oquintlalilloc namomajco. Huan ximotequiuatican ica nochin namoyolo quen tepactiya in Dios. Huan ahmo san ximonehnequican, huan niyan ic nanquitlanisque in tomin, tlahmo ica paquillistli xitequitican. ³Huan niyan ahmo ximohueyilican ica in aquin nanquinixpiyahque, in tlahmo xinemican ijcon quen nanquinequihque manemican yehhuan. ⁴Huan ihcuac monextilos in Cristo, aquin in hueyi paxtol den paxtolten, mechselilos nanyesque tehuauan ipan tehueyilistzin ompa neluicac.

⁵Huan no ijcon namehhuan nantelpopochten, xiquintlacamatian inohque tequihuaheten. Ximotlacamatian se huan oc seja, ica mahuesyotl, tleca ihcuiliutoc:

In Dios quinixnamiquilo
yehuan aquin
mohueyiliyahque,
huan quinuelitalo yehuan
aquin yoltlamachten.

⁶Ximotemactican temajco in Hueyicatzintli Dios, huan ijcon cuali mechueyililos ipan in tonali tlen motlalihtoc. ⁷Ayacmo ximoyolmohsihuican. Xicteluican Yehhuatzin, tleca mechpalehuilo.

⁸Xitlamautiyecan huan ximomaluican. In ahmo cuali tlacatl yeh in namotecocolicau, huan nentinemi quen tecuani nanalcatinemi. Huan quitemohua in aquin cuali quitlapolochtis.

⁹Xiquixnamiquican tleca yinanquimatihque quen yoquitlaniloc Yehhuatzin, huan quen nochin namotlasohicnihuan nohuiyan ipan in tlalticpac huelica tlapanohuahque ijcon quen namehhuan.

¹⁰In Dios omechnonotzaloc ompa nanyesque ipan tehueyilistzin quen nampoutoque tehuan in Cristo. Huan axan yeh in

aquin mechpalehuilos ica nochin tlen panos. Huan ic inon ihcuac onantlapanoque san quesqui tonali, Yehhuatzin Dios mechyoichicahualos huan mechyeclalilos ica in yancuic namonemilis. ¹¹Nochipa matlatequiutilo Yehhuatzin. Huan ijcon mayeto.

¹²In Silvano, se totlasohicniu yolcuali, quen nicnehnehuiliya, yeh in aquin oquihcuilui inin amatl. Huan ijquin namechnonotza ica tlen nantlapanoticaten. Huan namechmatiltiya ica nochin nele mechuelitalo in Dios. Ic inon xicneltocakan yec.

¹³Mechtlahpalohuahque yehuan aquin noyojqui tetlapehpeniluan Dios den tetiotlayehualoltzin ipan in altepetl Babilonia. Huan noyojqui mechtlahpalohua notlasohconeu Marcos.

¹⁴Ximotlahpalocan se huan oc seya ica tetlasohtlalis.

Mamechyoltlalilo tlamach namochten aquin nampoutoque tehuan Cristo.